






089.8
932
3

錢文選著


士青全集

許世英題



3 0646 7384 5

A 211200



序一

錢子士青以通才高識。服官政有名績矣。而天性孝友。服膺慈訓。拳拳不置之思。逮將終身焉。如孺子慕者。一日盡哀其所著文集見示。而屬序於余。大抵集中所見。皆其平生建樹之迹。出入家國社會。風誼卓然。沾溉宏遠。而一切推本於母教。由一室而推之至遠。發揮光大。至於無垠。自謂平生一言一行。凡有意志發動。必先體察。是否與母教不違。而後敢見諸實事。嗚乎。此其志量所及。豈淺見者所能窺其萬一者哉。世之徒震於熊熊之光絢爛之色者。固無得而稱也。余不文。愧無以益吾錢子。獨以爲文字之於人。本末務耳。垂諸空言。不如見諸實事。錢子之見於實事者。既盛矣。而况淵源深厚。若此者乎。是必傳矣。讀竟爲之斂襟三歎。乃題而歸之。中華民國二十八年歲次己卯春日。至德許世英序。

序二

集爲中華四庫寶藏之一。自來名作如林。爲精密鑑別之。可分有本之學與無本之學二種。有本之學。如土有堅韌之基。水有深厚之源。其培也高。其流也遠。究其原始造詣。必自根柢六經。而旁涉於諸子百家。重在綱常名教。關於世道人心。繫夫民生國計。絕非塗飾耳目。驚駭流俗。空言無補也。無本之學。

則中無所有。徒爲新奇怪誕綺麗紛華之說。以取悅於當世。甚且投時所好。不惜墮其素履。以應潮流。雖飾智矜愚。容或邀譽於僉夫豎子。而年湮代遠。自必等於芻蕘。棄諸糞壤。無復有途人過問矣。此則殫心著述。欲傳名於身後者。不可不於此加之意焉。錢都轉士青全集告成。余詳閱篇目。知其造詣立意。均超上乘。揚古挖今。弭中彪外。擬諸有本之學。洵無愧色。其家乘述德二編。均詳記祖德宗功。闡發靡遺。而表彰武肅王保境安民。恪守臣節。尤足爲千秋名藩疆吏模範。所謂重在綱常名教者。非耶。至其推崇孔聖。揚祖國之文化。論列感應。端後人之趨向。謂爲有關世道人心。庶幾近之。若夫爭得華茶大獎。振濟浙皖沉災。整理鹺綱。條陳憲政。保護僑民。維持留學。採譯英制。以資借鏡。周旋滇省。以企和平。殆無一非繫夫國計民生也。全集雖未注釋訓詁。而被派爲中國代表。出席於海牙萬國修身。倫敦萬國人種大會時。舉論孟精義。錯綜條貫。暢乎言之。如數家珍。謂非根柢六經者。能如是乎。其他文字之華贍。紀載之精詳。余姑不論。論其大者。願後之有志於著述之學人。知所矜式焉。己卯三月貴陽陳夔龍庸庵氏序於海上花近樓時年八十有三。

序三

詩曰。繩其祖武。書曰。續乃舊服。以服行事。傳序曰。弘宣祖業。皆言祖宗有美德。凡在苗裔。應不問年代

之久暫。數典毋忘。繩纘而弘宣之。俾世世無廢墜也。惟夷考史冊所載。如魏謩獻魏徵之故笏。李彥芳藏李靖之賜詔。亦遠至五世而止。斷未有時隔千數百載。代歷三十餘世。而猶緬述祖德。守而勿失。並多方搜集榮典品物。名賢論贊。以揚耿光。而資矜式者。有之自錢子士青始。錢子一生行誼。無一不以武肅王爲法。武肅貢販養親。錢子劬劬採樵。得資供母。其純孝同也。武肅勸董昌守臣節。董昌不從。因討滅之。錢子說唐督取消雲南獨立。服從中央。唐督就範。嗣以磋商條件不協中變。錢子亦離滇他去。其忠誠同也。武肅習春秋。善書畫。設吐握殿。延攬天下賢士。東南文化之盛。實武肅有以啓之。錢子弱冠入茂才。中歲舉孝廉。膺掄才之任。織登科之記。於英國大學會議。爭得中國大學地位。於辛亥清室解紐。設法維持留學生學費。其育才育士之成績。一本武肅之遺意。武肅捍海築塘。修水利。興農桑。開東南富庶之源。錢子辦理振務。注重以工代振。游覽山水。提倡開闢名勝。吸收外資。以裕貧民生計。見諸施行者。如修通公路。編草製冠。亦其一端。此蓋根於武肅爲民興利之宏願。隨時隨地而表見之也。武肅嘗冊拜海中諸國爲君長。因吳越奄有十四州。半爲海疆。深慮島國乘中原紛亂。夜郎自大。故假封號以懷柔之。錢子南駐金山。東游桑島。身歷者八國。旅居者五年。折衝樽俎。無不以講信修睦。尊重中國國體爲主旨。並欲以我華數千年之文教。遍傳於海外。於倫敦萬國人種大會。則演說中國文化爲世界之祖。於海牙萬國修身大會。則演說孔子道德以修身爲本。既啓異邦之信仰。並揚漢族之光

輝。卽權輿於武肅柔遠之精義。而神其運用。武肅嘗作八訓教子。戒勿逸豫。錢子承之。而立約析爨。最以儉勤。並詳示天人感應之理。武肅以業鹽起家。與膠鬲舉於漁鹽之中一轍。錢子因之。整頓鹺綱。歷冀滇閩浙皖鄂六省。滇有洞費歸公之舉。浙有苦澇撓鹽之禁。其事功之彰彰者。惜未調鼎和羹。一展其經濟大業耳。綜是以觀。非所謂繩其祖武者耶。非所謂續乃舊服。以服行事者耶。非所謂弘宣祖業者耶。故其全集一編。都一百萬言。雖所包者廣。而挾其要素。厥維以取法武肅爲主幹。余特揭而出之。至其文字之華贍。議論之透闢。紀載之豐富。寄托之深遠。是其餘事。姑不具論。是爲序。中華民國二十八年歲次己卯春三月齊耀珊拜撰。

序四

中國五千餘年來。向以孝治天下。孝經一書。爲自古所重。馬融根據孝經而作忠經。卽所謂求忠臣必於孝子之門也。錢子士青才猷卓犖。人僅知其爲達士。爲能吏。而不知其畢生事業。皆母教有以成之。其終身思慕不輟。凡有意志發動。必先審察是否與母教不悖。而後方敢見諸行事。純孝蓋出自天性。太夫人平素最尊祖敬宗。故錢子編輯錢氏家乘。合修溧陽廣德家譜。重修西湖錢王祠。繕治文穆王神道碑。建築忠獻王衣冠墓。爭回頭城門文穆王墓地。清丈蘇州廣陵郡王墓址。調查洛陽忠懿王墓。



清查上虞武肅王大長公主墓。修理天台會稽郡王墓。清釐杭州錢王祠產與承糧。免作公用。或爲人侵佔。旌功報請准。彰國家之榮寵。亦減輕負擔。凡地畝皆將圖照攝影。附入祠產補編。以垂久遠。卽本此旨。太夫人樂善好施。故錢子辦理浙省振務。及廣德災振。不遺餘力。活人無算。至修道路。便利行旅。設織草帽廠。救濟失業貧民。尤其小焉者耳。太夫人夙重道德。信因果。故錢子在國內則搜羅近祖明代象山錢唐公。爭回孟子配享。恢復孔孟祭祀各事。列入家乘。並述天人感應之理。以示子孫。在國外於海牙萬國修身。倫敦萬國人種各大會。代表中國演說。以論孟爲立言。使中國五千餘年文化。宣揚海外諸國。且以孔孟之學。爲世界文化之祖。一時傳遍歐美。衛道之功深。由於畫荻之訓肅也。太夫人關心人民疾痛。愛好和平統一。錢子在演時勸說唐督歸誠中央。以冀及早促成統一。事雖未成。用心良苦。蓋由曲體慈懷。不辭南北奔馳。太夫人素惡稅收弊竇。注重廉潔。錢子服官各省。以清廉著。所到之處。釐剔積弊。商困解除。而國課日增。雖陶母遺鮮傳書。雋母平反加餐。何以加茲。太夫人喜興學育才。故錢子居鄉。則仿范希文義莊之制。設立小學。培植貧寒子弟。監學外邦。則議增官費學額。維持留學經費。爭得中國大學學位。菁莪之化。端出自萱闈之教。錢子常憾早歲失恃。未能得祿而養。故入仕後。誥封贈錫。節操旌表。備極光榮。而表阡勒石。書撰墓銘。皆爲當代名流。春暉之報。庶乎無愧。其孝之一念。可謂始終不渝。所著此集。包羅萬有。可以孝字鑒括之。他日名山金石。拱璧同珍。是母是子。慈孝

大義。千秋不朽。凡欲以文字傳後者。其知所取法焉。是爲序。中華民國二十八年歲次己卯春日。至德周學熙謹撰。

序五

古來片長薄技之士。未顯其用。抑塞終身。每思垂空文以自見。或刻楮彫蟲。或縷冰斲朽。或摹繪月露風雲之狀。或紆寫笙歌絃管之情。甚至采蘭贈芍。豔藻紛披。談鬼說狐。齊諧競誌。雖年湮代遠。間有流傳。而考古證今。究無實用。卽如王朴平邊之策。陳亮中興之論。似爲審戎機切時要矣。而老於戰陣者。猶謂其書生無識。妄談兵事。始知著作傳世之難。而議論空虛。寄托頗僻者之必爲世詬病也。錢孝廉士青則不然。其人則磊落英多。其文則平正通達。全集一部。列目凡八。綜厥所長。得以尊祖孝親崇聖愛士憂國恤民利人便物十六字。隱括之。其第一集家乘。第二集述德。及第四集卷一吳越紀事詩百二十首。卽所謂尊祖孝親也。其第三集文稿內海牙萬國修身。倫敦萬國人種各大會。代表演說。發揚孔聖道德。爲世界文化之祖。卽所謂崇聖也。第六集雜俎所載留學生回國考試紀事。及第八集廿王兩君所撰編年事略內紀爭留學生官費名額。及辛亥冬間維持留學生學費。使不致失學。卽所謂愛士也。第六集雜俎所列憲政管見錄。滇省周旋和平史。無一非愛國。第六集雜俎所載廣德旱災大事

記。浙江賑務會工作概況。無一非恤民。至第五集之游記。第七集之聞見錄。於導游名勝之中。寓開發物產之意。第六集雜俎內之鹺務誌要。美國製鹽新法。獸類飼鹽利益辦法。英制綱要。西藏紀略等著。或則可供參考仿行。或則可資觀感興起。皆所以利人便物。條分縷析。粲然大觀。推之一切詩文。詠事詳贍。寄懷深遠。其有裨於世道人心。實匪淺鮮。極無頗僻之詞。何來空疏之誚。其必傳之千秋萬世。爲後來學者珍寶無疑。昔皇甫謐序左思三都賦。杜牧序李長吉文集。而二作因之增重。余愧非其人。僅就所知者爲券不朽而已。是爲序。共和二十八年己卯春三月通家愚兄七十九叟章棧謹撰。

序六

客有問於余曰。自來著作多矣。重意志乎。重文字乎。余應之曰。二者並重。惟必先有意志。而後以文字表見之。此本末次序之有一定也。古語有云。言以足志。文以足言。不言誰知其志。言之無文。行而不遠。尤以見二者之不可偏廢矣。士青孝廉。有志之士。亦能文之士也。最始志在得祿養親。迺以髫年失恃。未遂毛檄潘輿之願。引爲畢生遺憾。泊乎入壘宮。貢成均。登賢書。授京秩。志在立功報國。出任駐英留學生監督。增官費生學額。赴美充領事。爭華茶大獎。稍稍展其偉抱。尤以出席海牙萬國修身。倫敦萬國人種各大會。充任中國代表。演說孔聖道德。爲世界文化之祖一事。足以發揚國華。矜式異俗。嗣是

君志較酬矣。猶未盡也。憲政管見。對於祖國多所供獻。其他釐務誌要。美國製鹽新法。均足補管子桓寬論著之遺。緣是樞部信其有正策之術。歷授冀滇浙閩等省鹽務稽核所長。皖鄂等岸權運局長。兩浙鹽運使等職務。雖積弊肅清。稅收驟增。國計民生兩得其益。但局促鹽車。長材短馭。非其志也。民國肇建。軍閥據土。統一之局。遂成混亂。君志在消弭內爭。其時能左右南北勢力者。厥惟滇省。君以爲苟得唐督就範。則粵事亦不難迎刃而解。由是往來京滇。奔走幹旋。雖因條件不協。功虧一簣。而君之志良苦矣。綰權浙水時。一意搜羅錢吳越王遺蹟及遺物。編入家乘。並另纂武肅王功德史一編。廣列名人正論。矯正歐史謬誤。其志有二。一以表彰祖德。垂諸不朽。一以揭櫫保境安民之良模。使後來東南方州大吏知所效法也。最後從事振興工藝及地方公益之事。志在蘇民生而濟民困。小之則組織製造草帽工廠。大之募款振濟浙皖災歉。閱集內廣德旱災大事記。浙江賑務會工作概況。自明瞭其成績所在也。綜之君志既見上列所述。或有志竟成。或所志未逮。此非始願所及料耳。自編全集。蔚爲巨製。綱舉目張。條理井然。蓋由君夙長文字。意志所嚮。筆力均足以達之。樂旨潘詞。相輔而行。後有作者。應知所取法矣。己卯仲春黃巖喻長霖拜撰。時年八十有三。

序七

泰西學說。有所謂唯心論唯物論者。雖措詞立意。與中國古代訓詁註釋微有不同。要不能越經傳所載正心誠意格物致知範圍之外。不過彼得其粗。我得其精耳。以上任擇一門工夫。授諸好學之士。已爲其畢生研究探索所不能盡。故管仲商鞅。知開水利。盡地力。從事漁鹽農桑之業。而不能正誼明道。伊川紫陽能纂語錄。釋經訓。負起守先待後之責。而不能治兵理財。此非二者性質有不同。實以一人智力有不及也。錢士青孝廉幼以孔孟爲宗。殫心經術。具有根柢。時值世界棣通。早悟風會所趨。必須致力象譯寄韉之學。入校潛修。數載之後。精通外國語言文字。博覽西籍。兼之出洋考察。於歐美學術政治風尚習慣。與夫所以富強之由。莫不心領神會。擷精華而棄糟粕。歸獻祖國。類係政要。仍以吾華文物宣揚於海外。使彼邦人士。咸知崇奉孔聖。至其服官勤能。聲施爛然。無論已。卽在國內外。爭茶獎護學僑。編家乘。述祖德。修祠廟。置義莊。辦賑務。興實業。犖犖大端。無不有關世道人心。民生國計。其尤著者。爲表彰武肅王功德。周旋滇省和平兩事。武肅王當五代之時。海內鼎沸。民無寧宇。武肅王削平僭僞。保障一方。吳越十三州一軍。七鬯無驚。士女熙熙。如登春臺之樂。修水利。興農桑。立萬年富庶之基。好賢禮士。迄今東南人文之盛。亦自此肇之。新五代史撫拾不根之論。猶多誣譏。士青孝廉廣搜列代名賢正論。參以己見。辭而闢之。既可成爲永久鐵案。兼以樹宋元至今千餘年方鎮之模範。非僅有功於一姓一族已也。至欲關說滇督。歸附中央。苦心孤詣。實超漢代隨何陸賈而過之。倘事無扞格。民

國基礎早固。統一完成。對外國力益堅。雖後以商訂條件不洽。致無結果。而愛國熱忱。誠不可沒也。現已一律編入全集。實兼包西哲唯心唯物之精詣。而與經傳所載正心誠意格物致知之旨。亦隱相符合。洵堪推爲極有價值之宏著。必傳無疑。余故揭櫫於此。如讀者不察。僅於文字間求之。抑末已。己卯春日長沙鄭沅拜撰。

序八

宋歐陽文忠送徐無黨南歸序。曾文正亟稱道之。常舉以戒其門下士。蓋不僅文情之斐亹。足爲行文者法。其樹義之高。亦吾人一生之圭臬也。歐公之言曰。草木鳥獸之爲物。衆人之爲人。一同歸於腐壞。漸盡泯滅而已。惟有功德能文章者不朽焉。嗟乎。人之一生。如飄風送雨。飛鴻踏泥。事過則忘。境過則遷。豈可不蘄至於不朽。而一聽其漸盡泯滅耶。雖然。非易事也。夫有功德矣。苟不能文章。則亦不傳。故昔賢嘗云。惟能文章者不死。此之謂也。廣德錢君士青。四十年前。同學京師。共和初年。又同官滇省。其時余總辦綱。君司稽核。凡所商辦。無不相悅以解。故同事數年。成績甚著。君去而余亦改官。不久卽歸隱矣。然書素往還。凡君之所建樹。余皆得而誦悉焉。其在滇綜核名實。籌維國計。以及前此數歷中外。輯睦邦交。振興實業諸大端。余旣耳聞目見。語焉能詳。其後量移長蘆。都轉兩浙。措施裕如。以其暇述

祖德。修家乘。登山臨水。墨舞筆歌。一一發之於文章。讀之者靡不心傾。有恨不得窺全豹。時舉以相問者。而滬札適來。謂將綜合前後所撰各文稿。整理付印。顏曰士青全集。此後潛心佛法。收束身心。不欲再耗心力。并囑一言以爲序。余觀君之文。皆有裨於國計民生。非泛泛形諸楮墨者比。以公諸世。足以供世人之觀摩取則者。正復不少。其流傳於後。如歐公之所期許者。夫復何疑。然則斯集之印。又烏容已耶。因卽書所見以覆於君。贅諸簡端。聊爲嚶引。若以方皇甫謐之序左氏三都也。則吾豈敢。共和二十八年元旦同學弟姚安由雲龍謹撰。

序九

自古列侯方伯。以至於漢唐宋明正統之君。其易世以後。有能垂裕子孫。熾昌浸盛。散居天下。至百有餘支。如家王者乎。無有也。有能使其陵墓爲後世所保護崇敬。而不忍侵伐。其經營之迹。晏游之所。爲後人慨慕贊歎于無窮。如家王者乎。無有也。有能以詩文開一姓風氣。使千數百年子孫之秀傑者。各以不朽之學鳴世。至于更僕數之而未已。如家王者乎。無有也。此天下之言也。非錢氏之言也。顧家王之得此。必有其道矣。天之愛民甚矣。能爲生民造福者。天必佑之。爲生民造福于無窮。則其得天之祐亦無窮。此必然之理也。宋歐陽氏史記書吳越苛政。然吾觀兩浙地志。凡涉農田水利。有事興築者。必

推始于家王。是其所取諸民者。皆用諸民。雖周官理財。不過如此。明臣朱國禎歷數錢氏功德。謂吳越之民無一切差役。其奇器精縑。皆製于官。以充朝貢。民老死無他纏累。怪歐陽氏不一字及之。此足以破歐陽之謗書矣。雖然祖宗之功德雖盛。未必盡布于天下之耳目。子孫之支派雖衆。未必能合天下爲一家。于是我士青先生出焉。盡取家王功德諸紀載。與夫遺文軼事。薈爲一書。盡取天下錢氏百有餘支。最爲一譜。夫然後家王之功德盡布于天下之耳目。而錢氏子孫之散處天下者。萃而爲一家矣。從來孝子慈孫之業。未有盛于士青先生者也。先生世居廣德。出身孤寒。讀書稽古。遂爲時用。數歷中外。著書充棟。凡爲八集。第一集家乘。第二集述德。第三集以下則爲詩文游記。中外政治雜述。合五十餘種。本朝錢氏以文章名天下者不爲少矣。有如先生好古善述。而通當世之務者。殆難其人。先生爲家王三十二世孫。振鐙三十五世孫也。己卯之歲。將盡刊其書于海上。命振鐙爲之序。振鐙雖不文。不敢辭。先生著書雖多。而其學尙有未見于書者。讀是書畢。又將求先生之學于書之外。先生其許之乎。己卯春日宗晚生振鐙拜序。

自序

蓋聞舉綱者必提其綱。振衣者必挈其領。凡人之行誼亦然。倘無以綜述累年涉歷之經過。卽末由詳

規一生行誼之大概。前者於事實證明之。後者以文字闡發之。古之人所由撰傳記事略行述年譜留遺後世者。殆爲此也。司馬遷自序一篇。自述身世及著作悉備。故欲知公當日涉歷及其行誼。祇取史記一部觀之。無事旁搜博採也。余行能無似。而平素著述。亦散漫不加收拾。疊遭時變。散佚過半。竊恐長此以往。委燼殘編。盡焉凋盡。豈非生平憾事。太史公恨私心有所不盡鄙陋。沒世而文采不表現於後世。余縱未敢望其項背。亦並無若何著作行世。但於一生涉歷經過。雪泥鴻爪。彙而錄之。成一厚冊。並嘗分贈親朋。以誌不忘。藉明余自少而壯而老。思想之遞嬗。學術之變遷耳。古者富貴而名磨滅。不可勝紀。惟倜儻非常之人稱焉。余生平有志未逮。但亦不敢隨俗浮沈。與時俯仰。甘與草木同腐。今茲所作。似不可緩。試略述之。負米養母。失椿蔭於髫齡。燃脂讀書。擷芹香於中歲。貢成均而入國學。獲交當路公卿。奉使命而泛海槎。普護擔簦子弟。採風問俗。遍籀百二十國寶書。表聖尊經。宏開五千餘年文教。輯周處風土之記。借鏡攸資。效賈誼治安之章。批鱗罔避。嗣以時事日非。有懷莫遂。究心計政。侂跡鹽車。官山府海。曾披管子之篇。裕國恤商。待補桓寬之論。康樂述德。見之詩歌。眉山修譜。繫以文序。顯揚母節。景巴婦築懷清之臺。妥奠先塋。效永叔勒瀧岡之表。而王祖武肅際五代干戈之擾。措一方磐石之安。農桑關吳越之富源。教育啓江浙之文化。傳統三世。享祚百年。偉烈豐功。燦今震古。余追遠有志。數典敢忘。廟宇興修。綿不祧之俎豆。邱壠繕治。寶昭代之衣冠。增祭產。仿顏魯公之規。設義莊。採

范文正之制。券冊榮寵。搜集靡遺。圖像莊嚴。拓摩畢肖。聚列代名賢論贊。正歐史立說之誣。徵當時大吏碑題。述浙水保民之範。殫竭心力。彌矢精誠。外此圖息政爭。糾向戍弭兵之會。預防空戰。儲奇肱飛軼之才。雖功隳垂成。或事屬經始。要皆秉救時之愚悃。紓愛國之熱忱。洎乎巫峽辭官。武林退隱。救災恤患。撰林希元荒政之叢書。尋勝探幽。步司馬光游山之逸事。祥光普照。迎活佛於西來。紫氣彌空。候老聃之東至。旃檀會啓。靜參道德之經。獅子座開。廣種菩提之樹。悟釋道爲一貫。推孔孟爲獨尊。蠡管之見。願質賢者。現以避地。暫憩滬濱。將來歸老湖山。亦願閉戶讀書。不再出而問世。此次編輯。爲六十六年來一小結束。首綜綱領。次列條目。兼包並蓄。一覽瞭然。冀不致以零縑斷錦。貽後人覆瓿之譏。並縷述生平歷涉事蹟。以明篇中各種著作所由來。文行參觀。鯁生畢生精力。略萃於此。亦敝帚自珍之意云爾。中華民國二十八年歲次己卯春日廣德錢文選敍於海上寓廬。